

Situaziun solida er grazia a las valurs directivas

Cussegl grond accepta il preventiv 2019

■ **(anr/fa) Il preventiv 2019 prevesa in deficit da 33,7 milliuns francs, tuttina è la situaziun finanziaria dal chantun Grischun stabila. A l'avis da la maiorità dal parlament na dovri perquai nagin program da spargn sco proponì da la pld.** Malgrà il surpli d'entradas da 33,7 milliuns è la cumissiun da gestiun «tut en tut satisfatga» cun il preventiv 2019 per il chantun Grischun, ha ditg *Simi Valär* (pld, Tavau), il president da la cumissiun, mardi la damaun. Quel surpli datti, tenor sias explicaziuns, surtut causa ils gronds projects, la praschun Cazas ed il bajetg per l'administraziun chantunala Sinergia a Cuira. «La cumissiun salida l'intenziun da la regenza da sa preparar per temps pli difficils», ha menziunà Valär e ditg che la cumissiun proponia d'entrar e tractar il preventiv da maniera detagliada. Entrar en debatta nun è stà contestà. Avant questa debatta en detagl è però vegnida discutada la proposta davart in program da spargn fatga da la fracziun da la pld.

«Per evitar pes da taglia pli auts»

El sappia bain che la gronda part da las commembras e dals commembers dal parlament grischun sajan cunter in program da spargn, ha ditg *Urs Marti* (pld, Cuira), «igl è però meglier da cumenzar uss a spargnar ch'esser confruntads en dus, trais onns cun la necessitad da stuair auzar il pe da taglia.» La davosa giada ch'il cussegl grond aveva decis in pachet da spargn è stà l'onn 2003. «Quel program ha baingea fatg mal en divers regards, el ha dentant gi bunas consequenzas», ha ditg Marti. Da quel avis nun eran ses collegas da las autras partidas: *Urs Hardegger* (pbd, Sievgia) ha manegia ch'i na saja ne-

cessari «da spargnar sin reserva». *Remo Cavegn* (pcd, Razén) ha menziunà che la regenza haja cun il project GR Flex gia en elavuraziun in program per spargnar sch'i fetschia basegn. *Conradin Caviezel* (ps, Cuira) ha ditg che las finanzas dal chantun Grischun sajan uschè bunas ch'ins possa cuntinuar ad investir en gronds projects «sco vias, tunnels e praschuns». Quai stimuleschia tenor el l'economia chantunala. *Heinz Dürler* (pps, Maiavilla) ha menziunà che las vistas finanzialas

per ils proxims onns sajan main bunas, «igl è in nausch svilup».

Na a l'attatga da la pps sin il Museum d'art

La ministra da finanzas *Barbara Janom Steiner* ch'ha preschenta ses ultim preventiv annual ha ditg che la planisaziun finanziaria dal chantun s'haja «era grazia al pachet da spargn 2003» verificada: «Nus avain las valurs directivas che nus stuain respectar, p. ex. il cunfin da deficit

tar 50 milliuns francs. Quai è sco saivs directivas che procuran ch'il chantun ha ina gronda disciplina areguard las expensas.» La situaziun finanziaria dal Grischun è, sco ch'ella ha ditg, solida. «Proximain vegnin nus a preschentar noss project GR Flex, il qual procura ch'il chantun po spargnar da maniera flexibla sch'i vegn ad esser necessari.» La debatta en detagl è alura ida a fin senza grondas interrupziuns. Ina dumonda per ina midada ha mo fatg *Roman Hug* (pps, Tschintg

Vitgs): El ha proponì da scursanir la contribuziun chantunala per il personal dal Museum d'art a Cuira per 72 000 francs sin nov 12,8 milliuns francs. Quella proposta ha il cussegl grond però refusà cun 24:90 vuschs e duas abstenziuns. Il preventiv 2019 ha il parlament grischun acceptà senza midaments cun 112:0 vuschs.

Cunfin da deficits 50 milliuns francs

Il preventiv 2019 dal chantun Grischun mussa in surpli d'expensas da 33,7 milliuns francs. Quest deficit correspunda ad 1,3 pertschient dals custs totals da 2,5 milliardas francs. El lascha anc adina bunas vistas per in quint da facultad equilibrà. Las expensas d'investiziun sa chattan cun tut en tut brutto 446 milliuns francs sin il nivel fig aut da l'onn precedent. Las investiziuns nettas che ston vegnir finanzadas dal chantun cun agens meds importan 159,2 milliuns francs. Sco ch'ils responsabels dal departament per finanzas e vischnancas han communitgà observa il preventiv tut las directivas da la politica da finanzas dal cussegl grond. In exempel è ch'ils deficits annuals na dastgan betg esser pli gronds che 50 milliuns francs. La situaziun è tenor la ministra da finanzas *Barbara Janom Steiner* solida e stabila, «il chantun po prender per mauns las sfidas finanzialas dals proxims onns or d'ina buna posiziun da partenza».



Ils talers da tschigulatta che *Barbara Janom Steiner* aveva survegni gievan bain ensemen cun il tema preventiv 2019.

FOTO O. ITEM